

ըստ այնմ խորհիմք . ոչ հաճեցաւ նա՝ այլ ստիպէր սպասել : Եհաս թղթարերն 'ի Դամասկոսէ ('ի և Յուլիոսի), այլ ոչ ինչ յայտնեցին առ ժամն . Հայք զիմեցին առ Մուվէլ-լայն իմանալ ինչ, և նա ասէ՝ ստուգեցէք 'ի Դատաւորէն, զի յառաջագոյն ասացի ձեզ գրել 'ի Կոստանդինուպօլիս, դուք ոչ գրեցիք և զիս արգելիք 'ի գրելոյ, գնացէք ուրեմն հոգալ զգործն ձեր : Յետ աւուրց ինչ փոքու իմն յայտնէր Դատաւորն զվիտ գրոյն չլինել ձեռնամուխ 'ի գործն Ծննդեան եւ Աստուածածնի ըստ առաջագրութեան Յունաց, եւ սպասել նորոյ հրամանի Արքային : Հայք ասեն՝ դու զի՞նչ ասես վասն այսր : Դատաւորն՝ կամէի կատարել զգործն ձեր և չահիլ 'ի ձէնջ եւս, այլ զի՞նչ ասացից՝ Բդեշխն այնպէս գրեալ է, որպէս առ գործակալն : Գնացին Հայք առ Ոստիկան Կուսակալին, և նա առ զայրոյթ սրտին չկամէր պատասխանել և կամ յայտնել ինչ, այլ ասէր թէ՝ յետ ընթեռնոյ զգիրն՝ պատառեցի զարմացեալ ընդ գործս Բդեշխին . զի յետ տալոյ նորա կնքով իւրով քանիցս հրամանագիր, և ինձ եւս առանձին՝ կատարել զգործն ըստ մտաց հրովարտակին, այժմ զի՞ եղեւ նմա, որ զհակառակն գրէ . սակայն այս հարուած յայլմէ ումեք է, զի ինքն ոչ առնէ այսպէս, այլ մի երկընչիք զի խնդիրս այս դարձեալ լուծանի 'ի Դամասկոս, և ոչ անկանի 'ի Կոստանդինուպօլիս, զի նախատինք են նմա, և այլ սոցին նման բանք : Մատեան ապա առ Նուրի Էֆէնտի, և թախանձանօք ետուն ընթեռնուլ նմա զգիր Կուսակալին, որ ունէր օրինակ զայս . « Յոյնք գրեալ են առ իս թէ 'ի դատին Կոստանդինուպօլսոյ ոչ է լեալ դատաստան ինչ վասն Բեթղէհէմի և Աստուածածնի, և չունին գիր ինչ 'ի Պատրիարքէն և յազգէն իւրեանց վասն այնց խնդրոց, որք տեղեակք էին դատին . նմին իրի չհամարձակին Յոյնք զսեփհական և զբաժանորդ տեղիս յանձնել, և դուք եւս թողեալ զգործն այնպէս 'ի վիճակի իւրում՝ գրեցէք Իլամ և հարցունմն 'ի Դուռն, և 'ի դալտեան նորոյ հրամանի ըստ այնմ գործեցէք » : Նուրի Էֆէնտի արար նմա պատասխանի այսպէս, « Դուք յառաջագոյն հմուտ գոլով մտաց Արքունի գրոց՝ գրեցիք քանիցս գիր հրամանի վասն գործադրութեանց նոցին, իսկ որովհետեւ